

AMPLISSIMO SENATORVM ORDINI REIPUBLICAE NORIMBERGENSIS, Dominis suis incomparabiliter obseruandis, Thomas Geckhauff, cognomento Venatorius, seipsum commendat.



OMINEM ab ipsomet Opifice rerum, imperium in ipsam terram, adeoque in ipsas passim uniuersas creaturas accepisse: concessa etiam, quae homini, pro modulo sui status satis esset, cognitione rerum, Moses in ipso statim libri Geneseos uestibulo, scriptum reliquit. Homo autem simul atque mandatum Opificis minus, quam par erat, sanctè colere coepisset, prebuissetque iam aures aduersario lucis, protinus & accepto in rerum creaturas imperio exuitur, & summæ felicitatis, ad quam utique formatus fuerat, fruitione priuatur: adeò ut iam non tantum longissimè à uera felicitate exularet, sed etiam in ipsa rerum cognitione equidem miserè cæcutiret. Et meritò quidem. Qui enim supremæ contemptor est maiestatis, suprema quur non plecteretur pœna? Atqui ne penitus ab ea, ad quam semel fabricatus fuerat homo, excideret felicitate: præterquam quod Deus omnipotens bonitatis suæ uerbum, ut carnem indueret, misit, cuius deinde morte, labe illa contractæ impuritatis ablueretur: rursus etiam hominem, ad præclarissimarum rerum cognitionem, ceu per gradus quosdam artium ascendere uoluit, ut iam constanter nobis polliceri possimus, habere quãdam cum uirtute ipsa coniunctionem honestas artes omnes. Et si enim hodie inuentam ueritatem, sola sibi iure uendicat Theologia: inuentam una securè possidet pietas Christiana: nō tamen & alias liberales disciplinas cōtemnere debemus, ob eam duntaxat causam, quòd per ipsas adhuc quaeritur Veritas: sed potius & ipsæ in consuetudinem humanæ uitæ admittendæ, ne quæ usu adhuc rerum carent ingenia iuuentutis nostræ, penitus syluescant, dum perpetuò cultura bonarum artium destituuntur. Quod enim præstat cibus hominibus ut uiuant, id præstant honestæ disciplinae, ut bene uiuant. Alimenta corporibus si subduxeris, ipsa protinus uiuere desinent: & communi mortalium uitæ honestas artes, mox ut subducere coeperis, ipsa uita nostra, quid nisi quàm proximè ad brutorum uitam accedere uidebitur? Quare mea quidem sententia, hoc iuuentuti sunt artes honeste uniuersæ, quod himber est pratès arescētibus, quod riui hortis, quod agris cultus, & ipsis quod est uineis putatio. Cultura artium ut rebus humanis non parum adiicit splendoris & ornamenti, ita contemptus earum & morum & uitæ sinceritatem non infrequen-